

REGLUGERÐ

um skilyrði þess að sjálfstætt starfandi einstaklingar fái atvinnuleysisbætur.

Orðskýringar.

1. gr.

Í reglugerð þessari er merking hugtaka sem hér segir:

1. Sjálfstætt starfandi: einstaklingur sem starfar við eigin rekstur eða sjálfstæða starfsemi í því umfangi að honum sé gert að standa mánaðarlega, eða með öðrum reglubundnum hætti skv. ákvörðun skattyfirvalda, skil á tryggingagjaldi og virðisaukaskatti.
2. Rekstur: sjálfstæð starfsemi eða rekstur með eða án sérstaks atvinnutækis.
3. Nákominn: einstaklingur sem er tengdur eða skyldur sjálfstætt starfandi, sbr. 3. gr. laga um gjaldþrotaskipti nr. 21/1991.

Bótaréttur.

2. gr.

Atvinnuleysisbætur sjálfstætt starfandi sem verður atvinnulaus og er í atvinnuleit og uppfyllir skilyrði reglugerðar þessarar ákvarðast á eftirfarandi hátt:

1. Hafi hlutadeigandi staðið mánaðarlega í skilum með greiðslu tryggingagjalds og staðgreiðsluskatts af reiknuðu endurgjaldi miðað við fullt starf vegna síðustu 12 mánaða áður en hann varð atvinnulaus á hann rétt á hámarksbótum, sbr. 24. gr. laga um atvinnuleysisstryggingar, en hlutfallslega ella miðað við fjölda mánaða sem tryggingagjaldi var skilað.
2. Hafi hlutadeigandi á liðnum 12 mánuðum verið bæði í launavinnu og rekstri þá skal hver mánuður sem tryggingagjald og staðgreiðsluskattur hefur verið greitt fyrir miðað við fullt starf samsvara fullri dagvinnu þann mánuð við úrskurð bóta.
3. Greiðslur bóta skulu aldrei hefjast fyrr en 15 virkum dögum (3 vikum) eftir að hlutadeigandi skráði sig atvinnulausan og staðreynt hefur verið að hann var sjálfstætt starfandi, að hann hefur lagt starfsemina niður og er í atvinnuleit og hann uppfyllir skilyrði reglna þessara að öðru leyti.
4. Að öðru leyti gilda ákvæði laga um atvinnuleysisstryggingar um bótarétt, útreikning bóta og biðtíma vegna tekjutengingar.

Lok sjálfstæðrar starfsemi.

3. gr.

Sjálfstætt starfandi telst vera atvinnulaus, þegar hann uppfyllir öll eftirtalin skilyrði:

1. Er hættur rekstri, sbr. 4. - 6. gr.
2. Hefur ekki tekjur eða tekjuígildi af rekstri.
3. Hefur ekki hafið störf sem launamaður.
4. Er sannanlega í atvinnuleit og getur tekið tilboðum um vinnu.
5. Hefur tilkynnt lok rekstrarins til opinberra aðila, sbr. 4. gr.

Árstíðabundin stöðvun starfsemi eða tímabundin hlé, vegna verkefnaskorts eða af öðrum ástæðum, veita sjálfstætt starfandi ekki rétt til atvinnuleysisbóta. Stjórn Atvinnuleysisstryggingasjóðs skal þó hafa til hliðsjónar hvort einstaklingum hefur verið gert ókleift að halda áfram rekstri vegna sérstakrar löggjafar um atvinnustarfsemi þeirra enda sé stöðvunin samfleytt í fleiri en 24 daga.

4. gr.

Til að tilkynning um lok sjálfstæðrar starfsemi teljist fullnægjandi þarf hún að bera með sér að:

1. lok sjálfstæðrar starfsemi hafi verið tilkynnt launagreiðendaskrá ríkisskattstjóra og
2. virðisaukaskattskyldri starfsemi hefur verið hætt.

Stjórn Atvinnuleysistryggingasjóðs metur að öðru leyti hvað er fullnægjandi trygging fyrir því að sjálfstætt starfandi hafi hætt starfsemi.

5. gr.

Sjálfstætt starfandi sem hefur haldið áfram persónubundnu starfi sínu við reksturinn eftir að hafa byrjað í launavinnu telst ekki atvinnulaus og í atvinnuleit, þó hann missi launavinnuna, nema hann uppfylli skilyrði 3. gr. eða sýnt þyki að reksturinn framfleyti aðeins öðrum aðila sem hefur starfað að fullu við reksturinn. Stjórn Atvinnuleysistryggingasjóðs metur hvort skilyrði þessi séu uppfyllt.

Afhending eða lokun.

6. gr.

Sjálfstætt starfandi telst hættur rekstri ef hann sannar að rekstri hafi verið hætt, hann framseldur öðrum eða tekinn til gjaldþrotaskipta.

Sjálfstætt starfandi getur talist vera hættur rekstri áður en að til afhendingar eða lokunar kemur, ef hlutaðeigandi leggur fram skriflega sönnun á því að honum hafi verið gert ókleift að halda rekstrinum áfram t.d. með vörslusviptingu atvinnutækis.

Sjálfstætt starfandi getur ekki uppfyllt skilyrði 1. og 2. mgr. með því að afhenda reksturinn nákomnum í merkingu 1. tl. 3. gr. laga um gjaldþrotaskipti nr. 21/1991. Sjálfstætt starfandi getur uppfyllt skilyrði 1. og 2. mgr. með því að afhenda reksturinn afkomendum eða öðrum nákomnum ef sýnt þyki að reksturinn framfleyti aðeins þeim sem tóku við rekstrinum, þegar yfirtakan átti sér stað. Skal miðað við að dregið hafi úr veltu á hvoru undangenginna tveggja reikningsára er nemi samtals að lágmarki 40% yfir tímabilið. Stjórn Atvinnuleysistryggingasjóðs metur hvort skilyrði þessi séu uppfyllt.

7. gr.

Sjálfstætt starfandi sem telst atvinnulaus skv. 3. gr. getur sótt um það til stjórnar Atvinnuleysistryggingasjóðs að hefja sjálfstæða starfsemi að nýju áður en 12 mánuðir eru liðnir án þess að sæta viðurlögum skv. 8. gr. enda hafi skapast forsendur fyrir því að hefja rekstur á nýjan leik í a.m.k. 60 virka daga. Stjórn Atvinnuleysistryggingasjóðs metur hvenær þessar forsendur eru fyrir hendi.

Viðurlög.

8. gr.

Nú verður sjálfstætt starfandi uppvís að því að hafa sótt um atvinnuleysisbætur í tíma-bundnu hléi vegna verkefnaskorts eða af öðrum ástæðum eða að hafa haldið áfram sjálfstæðri starfsemi án tilskilinnar skattalegrar skráningar og skal stjórn Atvinnuleysistryggingasjóðs eða sá sem stjórnin hefur falið að annast greiðslu atvinnuleysisbóta til sjálfstætt starfandi, endurkrefja hlutaðeigandi um ofgreiddar bætur í samræmi við ákvæði 41. gr. laga um atvinnuleysistryggingar nr. 93/1993. Jafnframt skal hlutaðeigandi sviptur bótarétti í hámarkstíma skv. 41. gr. laganna. Nú hefur sjálfstætt starfandi í starfsgrein sem í eðli sínu er árstíðabundin störf í greininni að nýju innan 12 mánaða frá því að hann sótti um atvinnuleysisbætur og skal þá litið svo á að um tímabundið hlé hafi verið að ræða, sem ekki veitti rétt til atvinnuleysisbóta. Ef stjórn Atvinnuleysistryggingasjóðs hefur ekki veitti

samþykki sitt fyrir að rekstur sé hafinn á nýjan leik sbr. 7. gr. skal stjórn Atvinnuleysis-tryggingasjóðs eða sá sem stjórnin hefur falið að annast greiðslu atvinnuleysisbóta til sjálfstætt starfandi, endurkrefja hlutaðeigandi um greiddar atvinnuleysisbætur í samræmi við ákvæði 41. gr. laga um atvinnuleysistryggingar. Jafnframt skal svipta hlutaðeigandi bótarétti í hámarkstíma skv. 41. gr. laganna. Sama gildir ef í ljós kemur að hlutaðeigandi hefur haldið áfram sjálfstæðri starfsemi án tilskilinnar skattalegrar skráningar.

9. gr.

Stjórn Atvinnuleysistryggingasjóðs skal semja viðmiðunarreglur um framkvæmd 4.-7. gr. sem hljóta skulu staðfestingar ráðherra.

10. gr.

Reglugerð þessi sem sett er með stoð í 1. gr. laga um atvinnuleysistryggingar nr. 93/1993 öðlast þegar gildi. Jafnframt er felld úr gildi reglugerð nr. 389, 24. september 1993.

Félagsmálaráðuneytið, 25. maí 1994.

Jóhanna Sigurðardóttir.

Berglind Ásgeirsdóttir.

GJALDSKRÁ

vegna hundahalds í Raufarhafnarhreppi 1994.

1. gr.

Hundaleyfisgjald, sbr. 2. gr. staflíð b í samþykkt fyrir hundahald í Raufarhafnarhreppi, skal vera kr. 2.900, á árinu 1994. Gjaldið greiðist fyrirfram eigi síðar en á gjalddaga 1. júní 1994.

2. gr.

Handsömunargjald samkvæmt 3. gr. samþykktarinnar skal vera kr. 2.900, í fyrsta skipti, kr. 4.500, í annað skipti og kr. 6.800, í þriðja skipti.

3. gr.

Um vexti af vangreiddum gjöldum samkvæmt gjaldskrá þessari gilda almennar reglur.

4. gr.

Gjaldskrá þessi var samin og samþykkt af sveitarstjórn Raufarhafnarhrepps.

Heilbrigðis- og tryggingamálaráðuneytið, 31. maí 1994.

F. h. r.

Páll Sigurðsson.

Sólveig Guðmundsdóttir.